

# SAMÞYKKT

## um stjórn Bessastaðahrepps og fundarsköp hreppsnefndar.

### I. KAFLI

#### Um skipan hreppsnefndar og verkefni hennar.

##### 1. gr.

##### *Skipan hreppsnefndar.*

Hreppsnefnd Bessastaðahrepps er skipuð 7 fulltrúum kjörnum skv. lögum um kosningar til sveitarstjórna nr. 5/1998, sbr. 2. mgr. 10. gr. og 11. gr. sveitarstjórnarlaga nr. 8/1986.

##### 2. gr.

##### *Starfstímabil.*

Starfstímabil hreppsnefndar hefst 15 dögum eftir kjördag í sveitarstjórnarkosningum og gildir til jafnlengdar að fjórum árum liðnum.

##### 3. gr.

##### *Valdsvið.*

Hreppsnefnd fer með stjórn Bessastaðahrepps samkvæmt ákvæðum sveitarstjórnarlaga og annarra laga. Jafnframt fer hreppsnefnd með yfirstjórn stofnana og fyrirtækja á vegum sveitarfélagsins, að svo miklu leyti sem hreppsnefnd hefur ekki falið öðrum slíka yfirstjórn.

##### 4. gr.

##### *Verkefni hreppsnefndar.*

Hreppsnefnd skal gæta hagsmuna sveitarfélagsins og vera í fyrirsvari fyrir það og vinna að sameiginlegum velferðarmálum sveitarfélagsins.

##### 5. gr.

##### *Verkefni hreppsnefndar.*

Hreppsnefnd annast þau verkefni, sem henni eru falin í lögum, reglugerðum og samþykktum.

Þá getur hreppsnefnd ákveðið að sveitarfélagið taki að sér verkefni sem varðar íbúa sveitarfélagsins sérstaklega, enda sé það ekki falið öðrum til úrlausnar að lögum.

##### 6. gr.

##### *Verkefni hreppsnefndar.*

Meðal verkefna hreppsnefndar Bessastaðahrepps eru:

1. Að kjósa oddvita og varaoddvita hreppsnefndar, hreppsráð og aðrar nefndir, ráð og stjórnir skv. VI. kafla sveitarstjórnarlaga sbr. og V. kafla samþykktar þessarar, og skoðunarmenn til að annast endurskoðun ársreikninga sveitarfélagsins skv. VIII. kafla sveitarstjórnarlaga.
2. Að setja samþykktir og gjaldskrár eftir því sem lög mæla fyrir um og þörf krefur.
3. Að stjórna fjármálum sveitarfélagsins, stofnana þess og fyrirtækja, skv. VIII. kafla sveitarstjórnarlaga sbr. og II. kafla samþykktar þessarar.
4. Að ákveða stjórnkerfi sveitarfélagsins og ráða sveitarstjóra og aðra helstu starfsmenn sveitarfélagsins skv. VII. kafla sveitarstjórnarlaga, sbr. og VI. kafla þessarar samþykktar.

## II. KAFLI

## Um fjármálastjórn sveitarfélagsins.

## 7. gr.

*Þriggja ára áætlun.*

Á fyrsta ári hvers kjörtímabils skal hreppsnefnd semja þriggja ára áætlun um rekstur, framkvæmdir og fjármál sveitarfélagsins og skal þessi þriggja ára áætlun vera til leiðbeiningar við gerð árlegrar fjárhagsáætlunar sveitarfélagsins. Áætlunina skal endurskoða árlega í tengslum við afgreiðslu fjárhagsáætlunar og skal þá framlengja áætlunina um eitt ár.

## 8. gr.

*Afgreiðsla fjárhagsáætlunar.*

Hreppsnefnd skal afgreiða fjárhagsáætlun sveitarsjóðs, hreppsfyrirtækja og stofnana fyrir lok janúarmánaðar ár hvert að undangengnum tveimur umræðum í hreppsnefnd, sbr. 24. gr. samþykktar þessarar.

Ef ekki tekst að afgreiða fjárhagsáætlun skv. 1. mgr. skal hreppsnefnd sækja skriflega um frest til félagsmálaráðuneytisins og tilgreina ástæður fyrir umsókninni.

Form fjárhagsáætlunar skal vera í samræmi við form ársreikninga sveitarfélagsins og skal þar greint á milli rekstraráætlunar, fjárfestingaráætlunar og áætlunar um fjármagnshreyfingar.

Við afgreiðslu fjárhagsáætlunar tekur hreppsnefnd ákvarðanir um nýtingu tekjustofna sveitarsjóðs og tekjuöflun, um öflun lánsfjár, ef um það er að ræða og um ráðstöfun fjármagns á fjárhagsárinu bæði til rekstrar og eignabreytinga. Þá skal við gerð fjárhagsáætlunar hafa hliðsjón af veltufjárstöðu sveitarsjóðs í byrjun fjárhagsárs og áætla fyrir þeim breytingum, sem nauðsynlegt er talið að gera á veltufjárstöðunni.

## 9. gr.

*Fjárhagsáætlun.*

Fjárhagsáætlun skv. 8. gr. skal vera meginregla um fjármálastjórn sveitarfélagsins á fjárhagsárinu og ekki má stofna til útgjalda eða greiða fé úr sveitarsjóði nema heimild sé til þess í fjárhagsáætlun, útgjöldin séu lögbundin, sammingsbundin eða samþykkt af hreppsnefnd. Samþykki hreppsnefnd fjárveitingu eða útgjöld utan fjárhagsáætlunar, skal hún jafnframt taka ákvörðun um hvernig afla skuli fjár til þeirra útgjalda s.s. með lækkun annarra útgjalda, auknum tekjum eða lánsfé.

## 10. gr.

*Endurskoðun fjárhagsáætlunar.*

Hreppsnefnd er heimilt að endurskoða fjárhagsáætlun hafi forsendur fyrir henni breyst.

Slíkar breytingar afgreiðir hreppsnefnd við eina umræðu í hreppsnefnd, enda hafi breytingartillögurnar verið sendar hreppsfulltrúum með fundarboði og dagskrá a.m.k. fimm sólarhringum fyrir hreppsnefndarfund.

## 11. gr.

*Afgreiðsla ársreikninga.*

Hreppsnefnd skal hafa lokið fullnaðarafgreiðslu ársreikninga sveitarsjóðs og fyrirtækja hans eigi síðar en í júnílok ár hvert skv. 88. gr. sveitarstjórnarlaga, sbr. 82. og 83. gr. sömu laga. Eintak af ársreikningum skal senda Hagstofu Íslands og félagsmálaráðuneytinu fyrir 31. júlí ár hvert. Viðurlög skv. 2. mgr. 88. gr. sveitarstjórnarlaga liggja við vanrækslu hreppsnefndar á afgreiðslu og skilum ársreikninga.

## III. KAFLI

## Um fundarsköp hreppsnefndar.

## 12. gr.

*Fundartími hreppsnefndar.*

Hreppsnefnd heldur reglulega fundi einu sinni í mánuði, að jafnaði fyrsta þriðjudag hvers mánaðar.

Hreppsnefndarfundir skulu að jafnaði hefjast kl. 17.30, nema hreppsnefnd ákveði annað. Hreppsnefnd er heimilt að fella niður fundi í hreppsnefnd í allt að tvo mánuði að sumarlagi.

Aukafundi skal halda í hreppsnefnd eftir því sem þörf krefur að mati sveitarstjóra og oddvita hreppsnefndar og skylt er að halda aukafund í hreppsnefnd ef a.m.k. þriðjungur hreppsnefndarfulltrúa krefst þess.

## 13. gr.

*Fyrsti fundur nýkjörinnar hreppsnefndar.*

Aldursforseti nýkjörinnar hreppsnefndar kveður hreppsnefndina saman til fyrsta fundar að afloknum sveitarstjórnarkosningum eigi síðar en 15 dögum eftir að hún tekur við störfum, sbr. 2. gr. samþykktar þessarar, þ.e. eigi síðar en 30 dögum eftir kjördag.

Aldursforseti getur falið sveitarstjóra að boða fyrsta fund nýkjörinnar hreppsnefndar.

## 14. gr.

*Boðun hreppsnefndarfunda.*

Sveitarstjóri, sbr. þó 13. gr. samþykktar þessarar, boðar hreppsnefndarfundi og ákveður jafnframt fundarstað hafi hreppsnefnd ekki gert það.

Hreppsúum skal kunnert með auglýsingu hvar og hvenær hreppsnefndarfundir eru haldnir.

## 15. gr.

*Dagskrá hreppsnefndarfunda.*

Sveitarstjóri semur dagskrá hreppsnefndarfundar í samráði við oddvita og skal dagskráin fylgja fundarboði.

Á dagskrá hreppsnefndarfundar skal taka:

1. Lögákveðnar kosningar, svo sem kosningu oddvita hreppsnefndar, nefnda, ráða og stjórna á vegum hreppsnefndar, kosningu eða ráðningu sveitarstjóra og annarra fastra starfsmanna sveitarfélagsins, sem hreppsnefnd ræður sbr. 64. gr. samþykktar þessarar.
2. Fundargerðir hreppsráðs, nefnda, ráða og stjórna á vegum sveitarfélagsins, ef eða að svo miklu leyti sem hreppsnefnd þarf að samþykkja ályktanir sem í þeim felast, sbr. 60. gr. samþykktar þessarar.
3. Önnur mál sem falla undir verkvið hreppsnefndar og sveitarstjóri ákveður að taka á dagskrá eða einhver hreppsnefndarfulltrúi óskar að tekin verði á dagskrá hreppsnefndarfundar. Hreppsnefndarmaður, sem óskar að fá mál tekið á dagskrá hreppsnefndarfundar, skal tilkynna það sveitarstjóra skriflega með tillögu eða fyrirspurn a.m.k. fjórum sólarhringum fyrir fund.

Dagskrá hreppsnefndarfundar skulu fylgja afrit fundargerða, tillagna og annarra gagna sem sveitarstjóri telur nauðsynleg. Dagskrá skal jafnframt fylgja afrit fundargerðar síðasta hreppsnefndarfundar. Einstakir hlutar fundargerðarinnar eru þó ekki til umræðu á fundinum, nema fundurinn samþykki það sérstaklega.

## 16. gr.

*Boðsending fundarboða.*

Sveitarstjóri skal í síðasta lagi þremur sólarhringum fyrir hreppsnefndarfund hafa boðsent hreppsnefndarfulltrúum og varamönnum þeirra fundarboð hreppsnefndarfundar ásamt dagskrá og fylgigögnum.

## 17. gr.

*Boðun aukafunda.*

Sveitarstjóri skal boðsenda hreppsnefndarfulltrúum fundarboð aukafundar í hreppsnefnd ásamt dagskrá a.m.k. sólarhring fyrir fund. Heimilt er þó að boða aukafund með styttri fyrirvara er aðkallandi mál bíður afgreiðslu, enda sé hann boðaður (símleiðis) með dagskrá.

## 18. gr.

*Kosning oddvita og varaoddvita hreppsnefndar.*

Aldursforseti hreppsnefndar setur fyrsta fund nýkjörinnar hreppsnefndar og stýrir honum uns oddviti hreppsnefndar hefur verið kjörinn.

Oddviti hreppsnefndar skal kjörinn til eins árs í senn.

Sá er rétt kjörinn oddviti, sem fengið hefur atkvæði meirihluta hreppsnefndarfulltrúa. Verði þeim atkvæðafjöldi eigi náð, skal kjósa að nýju um þá tvo sem flest atkvæði fengu. Hafi þrír eða fleiri hreppsnefndarfulltrúar fengið jafnmörg atkvæði skal varpa hlutkesti um hverja tvo skuli kjósa. Verður þá sá rétt kjörinn oddviti hreppsnefndar, sem fleiri atkvæði fær. Verði atkvæði jöfn, skal hlutkesti ráða kosningu.

Oddviti hreppsnefndar stjórnar kjöri varaoddvita hreppsnefndar og skal sömu aðferð beitt við kosningu hans, sbr. næstu málsgrein hér að framan. Varaoddviti skal kjörinn til jafnlangs tíma og oddviti.

Sé hvorki oddviti né varaoddviti á fundi gegnir aldursforseti oddvitastörfum, nema hreppsnefnd ákveði að kjósa sérstakan fundarstjóra.

Ef oddviti deyr eða verður varanlega forfallaður frá oddvitastörfum skal kjósa oddvita í hans stað til loka kjörtímabils oddvita.

## 19. gr.

*Kosning skrifara.*

Hreppsnefnd getur kosið skrifara og varaskrifara úr hópi hreppsnefndarfulltrúa til eins árs í senn á sama fundi og oddvitakosning fer fram. Skrifarar skulu kosnir hlutfallskosningu.

Skrifarar skulu telja saman atkvæði við kosningar og þegar atkvæðagreiðslur fara fram í hreppsnefnd.

## 20. gr.

*Fundarstaður.*

Hreppsnefndarfundur skal haldinn í húsnaði sem fullnægir ákvæðum skipulags- og byggingarlaga og reglugerðar um aðgang fatlaðs fólks. Meðan ákvæðum 1. málslíðar er ekki fullnægt skal hreppsnefnd sjá til þess að fatlað fólk fái nauðsynlega aðstoð æski það að hlýða á hreppsnefndarfund.

Hreppsnefndarfundur skal að jafnaði halda í heyranda hljóði og almenningi heimilaður aðgangur að þeim eftir því sem húsrúm leyfir.

Hreppsnefnd getur ákveðið að einstök mál verði rædd fyrir luktum dyrum, svo sem viðkvæm einkamál manna eða viðskiptamál, sem æskilegt er vegna hagsmuna sveitarfélagsins að rædd verði fyrir luktum dyrum. Tillaga um að mál skuli rædd fyrir luktum dyrum skal afgreidd umræðulaust í hreppsnefnd.

Óheimilt er að skýra frá því sem fram kemur við umræður á lokuðum fundi í hreppsnefnd.

## 21. gr.

*Lögmæti hreppsnefndarfunda.*

Hreppsnefndarfundur er lögmætur ef meira en helmingur hreppsnefndarfulltrúa er á fundi.

Hreppsnefnd getur enga bindandi ályktun gert nema fundur sé lögmætur.

## 22. gr.

*Fundarstjórn.*

Oddviti hreppsnefndar stýrir fundum hennar. Hann setur fund, kannar lögmæti hans og stjórnar umræðum og afgreiðslu mála, sér um að fundargerðir séu færðar og slítur fundi þegar dagskrá hans er tæmd. Oddviti úrskurðar um skilning á fundarsköpum, en skjóta má úrskurði hans til úrlausnar hreppsnefndar. Oddviti sér um að allt fari skipulega og löglega fram á hreppsnefndarfundum og er hreppsnefndarfulltrúum skylt að lúta valdi hans að því er varðar fundarsköp og góða reglu. Raski áheyrandi fundarfriði, getur oddviti vísað honum úr fundarsal. Leyfi oddvita þarf til að taka myndir og hljóðrita umræður á hreppsnefndarfundum.

## 23. gr.

*Afgreiðsla dagskrármála á fundi.*

Mál skulu tekin til umræðu og afgreidd í hreppsnefnd í þeirri röð sem þau eru á dagskrá nema oddviti hreppsnefndar ákveði annað. Heimilt er að taka til meðferðar á hreppsnefndarfundum mál, sem ekki hefur verið á dagskrá, ef 2/3 viðstaddra hreppsnefndarfulltrúa samþykka slíkt afbrigði.

## 24. gr.

*Afgreiðsla mála, tvær umræður.*

Hreppsnefnd afgreiðir mál að jafnaði við eina umræðu. Þó skal hafa tvær umræður með a.m.k. einnar viku millibili um eftirtalin málefni:

1. Fjárhagsáætlun sveitarfélagsins.
2. Arsreikninga sveitarfélagsins og fyrirtækja þess.
3. Samþykktir, reglugerðir og gjaldskrár, sem hljóta eiga staðfestingu ráðherra.
4. Áætlanir fyrir sveitarfélagið sem gilda eiga til lengri tíma svo sem þriggja ára áætlanir og skipulagsáætlanir.
5. Beiðni um fjárhagsaðstoð skv. 90. gr. sveitarstjórnarlaga.

## 25. gr.

*Fundarsókn, varamenn.*

Hreppsnefndarfulltrúa er skylt að sækja alla hreppsnefndarfundum nema lögmæt forföll hamli því um stundarsakir og skal hann tilkynna eða láta tilkynna forföllin til sveitarstjóra. Hreppsnefndarfulltrúa sem forfallast um stundarsakir er heimilt að ákveða hver varamanna hans taki sæti á hreppsnefndarfundum ella tekur varamaður sæti samkvæmt ákvæðum 1. og 2. mgr. 35. gr. sveitarstjórnarlaga.

Sveitarstjóri skal sitja fundum hreppsnefndar með málfrelsi og tillögurétt, en ekki hefur hann atkvæðisrétt nema hann sé kjörinn hreppsnefndarfulltrúi.

Hreppsnefnd getur heimilað að maður utan hreppsnefndar kveðji sér hljóðs á hreppsnefndarfundum.

## 26. gr.

*Fundarsköp: Málfrelsi fundarmanna.*

Hreppsnefndarfulltrúi hefur málfrelsi, tillögurétt og atkvæðisrétt á hreppsnefndarfundum. Hreppsnefndarfulltrúi sem taka vill til máls skal óska heimildar oddvita. Að jafnaði

skulu hreppsnefndarfulltrúar taka til máls í þeirri röð sem þeir hafa kvatt sér hljóðs. Víkja má frá þeirri reglu ef um er að ræða sveitarstjóra, framsögumann í máli eða hreppsnefndarfulltrúa, sem óskar að gera stutta athugasemd eða koma leiðréttingu á framfæri. Hafi tveiri eða fleiri hreppsnefndarfulltrúar kvatt sér hljóðs samtímis, ákveður oddviti í hvaða röð þeir skuli tala.

## 27. gr.

*Fundarsköp: Takmarkanir á málfrelsi.*

Hreppsnefndarfulltrúi skal beina máli sínu til oddvita. Þegar til umræðu er fundargerð hreppsráðs, annarra nefnda, ráða eða stjórnna skal hreppsnefndarfulltrúi taka fram hvaða lið/liði fundargerðarinnar hann óskar að ræða.

Hreppsnefndarfulltrúi má tala tvisvar við hverja umræðu máls. Heimilt er þó hreppsnefndarfulltrúa að taka oftari til máls til að bera af sér ámæli eða til að gera stutta athugasemd við fundarsköp. Sveitarstjóri, flutningsmaður tillögu eða framsögumaður (talsmaður flutningsmanna) mega þó tala oftari en tvisvar við hverja umræðu máls.

Ekki má hreppsnefndarfulltrúi lesa upp prentað mál við umræður í hreppsnefnd nema með leyfi oddvita.

## 28. gr.

*Fundarsköp: Vítur á hreppsnefndarfulltrúa.*

Beri hreppsnefndarfulltrúi aðra menn brigslum skal oddviti víta hann. Oddviti getur lagt til við hreppsnefnd, að hreppsnefndarfulltrúi, sem víttur hefur verið tvisvar á sama fundi verði sviptur málfrelsi á þeim fundi. Skal slík tillaga afgreidd umræðulaust. Hljóðnist hreppsnefndarfulltrúi ekki úrskurði oddvita eða hreppsnefndar eða ef óregla kemur upp á fundi, skal oddviti gera fundarhlé, fresta fundi eða slíta fundi ef nauðsyn krefur.

## 29. gr.

*Fundarsköp: Takmarkanir á ræðutíma.*

Telji oddviti umræður dragast úr hófi fram getur hann lagt fram dagskrártillögu um að ræðutími hvers hreppsnefndarfulltrúa verði takmarkaður, umræðum verði lokið á tilteknum tíma eða umræðum um mál verði lokið þá þegar. Hver hreppsnefndarfulltrúi getur og borið fram slíkar tillögur. Hreppsnefnd afgreiðir tillögur um takmörkun umræðna umræðulaust. Ekki má þó takmarka umræðu um mál svo að hún standi skemur en tvær klukkustundir ef einhver hreppsnefndarfulltrúi kveður sér hljóðs. Umræður um fjárhagsáætlun eru ekki háðar ákvæðum greinar þessarar.

## 30. gr.

*Fundarsköp: Meðferð tillagna.*

Hreppsnefndarfulltrúi getur borið fram breytingartillögu, viðaukatillögu, frávísunartillögu eða frestunartillögu við hvert það mál sem til umræðu er á fundi. Slíkar tillögur skulu vera skriflegar ef oddviti óskar. Oddviti ákveður í hvaða röð og með hvaða hætti slíkar tillögur eru teknar til afgreiðslu.

## 31. gr.

*Fundarsköp: Afgreiðsla mála.*

Mál er afgreitt í hreppsnefnd með því að samþykkja það eða fella það, vísa því frá hreppsnefnd eða vísa því til afgreiðslu hreppsráðs, annarrar nefndar, ráðs eða stjórnar eða sveitarstjóra. Máli sem hreppsnefnd ber að lögum að afgreiða verður þó eigi vísað til afgreiðslu annarra. Hreppsnefnd er heimilt að fresta afgreiðslu máls nema um sé að ræða mál sem að lögum ber að afgreiða fyrir tiltekinn tíma.

## 32. gr.

*Fundarsköp: Atkvæðagreiðsla.*

Atkvæðagreiðsla á hreppsnefndarfundum fer að jafnaði fram með handauppréttingu. Forseti biður þá hreppsnefndarfulltrúa sem samþykkja mál að rétta upp hægri hönd sína. Að því búnu leitar oddviti mótatkvæða með sama hætti. Loks skýrir oddviti frá úrslitum atkvæðagreiðslunnar.

Ef mál er svo vaxið að oddviti telur ástæðulaust að atkvæðagreiðsla fari fram um það skýrir hann frá því að hann telji mál samþykkt eða fellt án atkvæðagreiðslu nema athugasemd verði við það gerð.

Oddviti getur ákveðið, að mál verði afgreitt með nafnakalli. Einnig ber oddvita að láta fara fram nafnakall, ef a.m.k. þriðjungur hreppsnefndarfulltrúa óskar þess. Við nafnakall skal farið eftir tölusettri nafnaskrá hreppsnefndarfulltrúa í stafrófsröð og skal það ráðast af útdrætti, hvaða hreppsnefndarfulltrúi greiðir fyrst atkvæði við nafnakall. Við nafnakall skal oddviti greiða atkvæði síðastur. Við nafnakall svarar hreppsnefndarfulltrúi, þegar oddviti les upp nafn hans, já eða nei eftir því hvort hann er með máli eða móti eða tekur fram, að hann greiði ekki atkvæði, en slík afstaða telst þó þátttaka í atkvæðagreiðslu.

Heimilt er að afgreiða mál með skriflegri atkvæðagreiðslu, ef hreppsnefndarfulltrúi óskar og hreppsnefnd samþykkir.

## 33. gr.

*Fundarsköp: Úrslit atkvæðagreiðslu.*

Við atkvæðagreiðslu ræður einfaldur meirihluti atkvæða úrslitum máls nema öðruvísi sé ákveðið í lögum. Verði atkvæði jöfn með máli og móti fellur það.

Kosningar sem fram fara í hreppsnefnd skulu vera hlutfallskosningar skv. d'Hondts reglu, sbr. 16. og 17. gr. sveitarstjórnarlaga.

Þegar kjósa skal einn fulltrúa eða ráða starfsmann úr hópi margra sem tillögur hafa komið fram um skal kosning fara fram með sama hætti og kosning oddvita hreppsnefndar, sbr. 3. mgr. 18. gr. þessarar samþykktar.

Kosningar skulu vera leynilegar, bundnar hlutfallskosningar ef hreppsnefndarfulltrúi óskar og hreppsnefnd samþykkir.

## 34. gr.

*Fundarritun - fundargerð.*

Hreppsnefnd getur ráðið sérstakan fundarritara utan hreppsnefndar til að annast ritun fundargerða í gerðabók hreppsnefndar. Í fundargerð skal getið hvar og hvenær fundur er haldinn, töluröð fundar og hverjir sitji hann. Skrá skal þau mál sem tekin eru fyrir, dagsetningu þeirra, aðila máls og meginefni og hvernig mál er afgreitt. Sé mál ekki afgreitt samhljóða skal greina í fundargerð hvernig atkvæði hafa skipst. Þegar lagðar eru fram fundargerðir nefnda nægir að skrá í fundargerð hreppsnefndar um hvaða nefndir er að ræða og dagsetningu fundargerða.

Heimilt er að skrá fundargerðir í tölvu. Sé það gert skal bóka í gerðabók hreppsnefndar númer fundar, hvar og hvenær fundurinn er haldinn og að fundargerð sé færð í tölvu. Þá skal færa í gerðabók fundarslit og greina blaðsíðutal fundargerða. Hreppsnefndarfulltrúar skulu rita nöfn sín við slit fundar í gerðabók.

Í lok fundar skal fundargerð lesin og skulu allir viðstaddir hreppsnefndarfulltrúar undirrita hana nema hreppsnefnd ákveði annað. Einnig skal oddviti hreppsnefndar og a.m.k. einn fundarmanna setja upphafsstafi sína undir hverja blaðsíðu fundargerða, sem blaðsíðusettar skulu í áframhaldandi töluröð.

Undirritaðar fundargerðir skulu reglulega bundnar inn í fundargerðabók hreppsnefndar til varanlegrar varðveislu.

Mál sem tekin eru fyrir á lokuðum fundi sbr. 3. mgr. 20. gr. samþykktar þessarar skal skrá sem trúnaðarmál.

Hreppsnefndarfulltrúi á rétt á að fá bókaða stutta athugasemd um afstöðu sína til máls sem til meðferðar er í hreppsnefnd.

Oddviti skal hafa eftirlit með því að fundargerðir séu skipulega og rétt færðar.

Hreppsnefndarfulltrúi sem gera vill athugasemd við eitthvert atriði í fundargerð, getur undirritað fundargerðina með fyrirvara um það atriði.

Hreppsnefnd getur ákveðið að umræður á hreppsnefndarfundum skuli hljóðritaðar eða teknar upp með öðrum hætti. Verði það ákveðið skal hreppsnefnd setja um það nánari reglur.

#### IV. KAFLI

### Um réttindi og skyldur hreppsnefndarfulltrúa.

#### 35. gr.

##### *Dagskrá hreppsnefndarfunda.*

Hreppsnefndarfulltrúi á rétt á að fá mál skv. 4. og 5. gr. samþykktar þessarar tekið á dagskrá hreppsnefndarfundar, enda tilkynni hann það sveitarstjóra skriflega a.m.k. þremur sólarhringum fyrir fund.

#### 36. gr.

##### *Fundarseta.*

Hreppsnefndarfulltrúa er bæði rétt og skylt að sækja fundi hreppsnefndar nema lögmæt forföll hamli, sbr. 25. gr. samþykktar þessarar. Hver hreppsnefndarfulltrúi er skyldur til að taka að sér þau störf sem hreppsnefnd felur honum og varða verkefni hreppsnefndar, s.s. oddvitastörf og störf í hreppsráði eða öðrum nefndum á vegum hreppsnefndar. Þó getur sá sem verið hefur oddviti eitt kjörtímabil eða lengur eða setið í hreppsráði eða annarri nefnd sama tímabil skorast undan kosningu jafnlangan tíma og hann hefur haft starfið á hendi.

#### 37. gr.

##### *Lausn úr hreppsnefnd.*

Nú telur hreppsnefndarfulltrúi sig ekki geta gegnt skyldum sínum í hreppsnefnd án óhæfilegs álags og getur hreppsnefnd þá létt af honum störfum eða veitt honum lausn að eigin ósk um tiltekinn tíma eða til loka kjörtímabils. Varamaður tekur þá sæti hans skv. 35. gr. sveitarstjórnarlaga.

#### 38. gr.

##### *Málfrelsi, tillöguréttur, atkvæðisréttur.*

Hreppsnefndarfulltrúi hefur málfrelsi, tillögurétt og atkvæðisrétt á fundum hreppsnefndar eftir því sem nánar er ákveðið í samþykkt þessari.

Hreppsnefndarfulltrúa er ekki skylt að taka þátt í atkvæðagreiðslu um einstök mál. Þegar um er að ræða mál sem hreppsnefnd er að lögum skylt að afgreiða, s. s. fjárhags-áætlun, ársreikninga eða kjör fulltrúa í lögboðnar nefndir, getur oddviti ákveðið að endurtaka atkvæðagreiðslu ef minna en helmingur hreppsnefndarfulltrúa tekur þátt í atkvæðagreiðslunni.

#### 39. gr.

##### *Hagsmunir sveitarfélagsins.*

Hreppsnefndarfulltrúa ber að gegna hreppsnefndarfulltrúastörfum sínum af alúð og samviskusemi og gæta hagsmuna sveitarfélagsins, en í störfum sínum er hreppsnefndarfulltrúi einungis bundinn af lögum og sannfæringu sinni.

## 40. gr.

*Aðgangur að upplýsingum.*

Hreppsnefndarfulltrúi á aðgang að bókum, skjölum og öðrum gögnum sveitarfélagsins og einnig óhindraðan aðgang að stofnunum og fyrirtækjum sveitarfélagsins á venjulegum afgreiðslutíma til upplýsingaöflunar vegna starfa sinna.

## 41. gr.

*Þagnarskylda.*

Hreppsnefndarfulltrúi skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum, eðli máls eða sérstakri ákvörðun hreppsnefndar.

## 42. gr.

*Vanhæfi hreppsnefndarfulltrúa.*

Hreppsnefndarfulltrúa ber að víkja sæti við umræður og afgreiðslu máls þegar það varðar hann sjálfan, skyldmenni eða nána venslamenn hans svo að almennt megi ætla að viljaafstaða hans mótist að einhverju leyti þar af. Honum er þó heimilt að gera stuttlega grein fyrir afstöðu sinni. Hreppsnefnd sker umræðulaust úr hvort mál er svo vaxið. Hreppsnefndarfulltrúi sem hlut á að máli má taka þátt í atkvæðagreiðslu um hæfi sitt. Hreppsnefndarfulltrúa sem veit hæfi sitt orka tvímælis ber að vekja athygli oddvita hreppsnefndar á því. Hreppsnefndarfulltrúi sem vanhæfur er við úrlausn máls skal yfirgefa fundarsal hreppsnefndar við umræður um málið og afgreiðslu þess.

## 43. gr.

*Þóknun.*

Hreppsnefndarfulltrúi skal fá hæfilega þóknun úr sveitarsjóði fyrir störf sín í hreppsnefnd.

Takist hreppsnefndarfulltrúi á hendur ferð á vegum hreppsins skv. ákvörðun hreppsnefndar á hann rétt á greiðslu ferða- og dvalarkostnaðar.

## 44. gr.

*Orlof og fundartími.*

Haga skal fundum hreppsnefndar þannig að hreppsnefndarfulltrúar eigi möguleika á að taka sér orlof árlega, sbr. 12. gr. samþykktar þessarar.

## 45. gr.

*Fjarvera vegna veikinda - varamenn.*

Geti hreppsnefndarfulltrúi ekki sótt hreppsnefndarfund/fundi vegna veikinda eða af öðrum ástæðum tekur varamaður hans sæti sitt meðan þannig hagar til skv. 25. gr. samþykktar þessarar.

## 46. gr.

*Varamenn.*

Ákvæði þessa kafla um réttindi og skyldur hreppsnefndarfulltrúa gilda einnig um varamenn, sem sitja hreppsnefndarfundi.

## V. KAFLI

**Hreppsráð, aðrar nefndir, ráð og stjórnir.**

## 47. gr.

*Kosning í hreppsráð og nefndir.*

Hreppsnefnd kýs fulltrúa í hreppsráð, aðrar nefndir, ráð og stjórnir samkvæmt ákvæðum laga, reglugerða og samþykktar þessarar. Slíkar kosningar skulu vera leynilegar, bundnar hlutfallskosningar, ef einhver hreppsnefndarfulltrúi óskar þess.

Forstöðumenn og stjórnendur fyrirtækja og stofnana sveitarfélagsins eru ekki kjörgengir í stjórnir þeirra stofnana sem þeir starfa hjá.

## 48. gr.

*Kosning í hreppsráð.*

Hreppsnefnd skal á fyrsta fundi að afloknum hreppsnefndarkosningum kjósa þrjá hreppsnefndarfulltrúa í hreppsráð til eins árs og jafnmarga til vara. Aðalfulltrúar í hreppsnefnd eru einir kjörgengir sem aðalmenn og varamenn í hreppsráð.

Sveitarstjóri situr fundi hreppsráðs með málfrelsi og tillögurétt, en atkvæðisrétt hefur hann aðeins ef hann er hreppsnefndarfulltrúi og kjörinn í hreppsráð.

Heimilt er flokki eða framboðsaðila sem fulltrúa á í hreppsnefnd en ekki hefur fengið kjörinn hreppsráðsmann, að tilnefna fulltrúa til setu á fundi hreppsráðs með málfrelsi og tillögurétt. Hreppsnefnd er skylt að gefa fulltrúa flokks/framboðsaðila kost á setu í hreppsráði með málfrelsi og tillögurétt þann tíma sem fundir hreppsnefndar falla niður vegna sumarleyfa, sbr. 12. gr. samþykktar þessarar.

## 49. gr.

*Fundartími hreppsráðs.*

Hreppsráð skal að jafnaði halda fundi tvisvar í hverjum mánuði, annan og fjórða miðvikuðag mánaðarins. Hreppsráðsfundir skulu að jafnaði hefjast kl. 8.00, nema hreppsráð ákveði annað. Aukafundi skal halda ef sveitarstjóri, formaður hreppsráðs eða a.m.k. tveir hreppsráðsfulltrúar óska þess.

## 50. gr.

*Undirbúningur og boðun hreppsráðsfunda.*

Sveitarstjóri undirbýr hreppsráðsfundi. Hann sér um að hreppsráð sé boðað til fundar með skriflegu fundarboði ásamt dagskrá a.m.k. tveimur sólarhringum fyrir fund. Aukafundi er heimilt að boða með styttri fyrirvara. Geti hreppsráðsmaður ekki sótt fund, skal hann boða varamann sinn eða hlutast til um að varamaður verði boðaður.

## 51. gr.

*Kosning formanns og varaformanns hreppsráðs.*

Á fyrsta fundi nýkjörins hreppsráðs skal kjósa formann og varaformann hreppsráðs. Formaður hreppsráðs stjórnar fundum þess og sér um að allt fari löglega og skipulega fram á þeim. Hann úrskurðar í ágreiningsmálum sem upp kunna að koma út af fundarsköpum, en skjóta má úrskurði hans til úrlausnar hreppsráðs. Heimilt er að taka mál til meðferðar í hreppsráði þótt það sé ekki tilgreint í dagskrá. Þó er skylt að fresta afgreiðslu slíks máls ef einhver hreppsráðsmaður óskar þess.

Hreppsráð getur ráðið sér fundarritara utan hreppsráðs. Í fundargerðabók ráðsins skal skrá hvar og hvenær fundur er haldinn og hverjir sitji fundinn. Þá skal skrá í fundargerð mál sem ráðið tekur til umræðu og afgreiðslu. Skrá skal frá hverjum þau eru, hvenær þau eru dagsett, efni þeirra stutt og skilmerkilega og hvaða afgreiðslu þau hljóta. Fundarsköp hreppsráðs lúta sömu reglum og gilda um hreppsnefnd eftir því sem við á.

## 52. gr.

*Hreppsráð: Fjármálastjórn og fullnaðarafgreiðsla mála.*

Hreppsráð fer ásamt sveitarstjóra með framkvæmda- og fjármálastjórn sveitarfélagsins, að því leyti sem slík stjórn er ekki falin öðrum. Hreppsráð hefur umsjón með stjórnsýslu sveitarfélagsins, undirbúningi árlegrar fjárhagsáætlunar, semur drög að fjárhagsáætlun sveitarsjóds og hreppsfiirtækja að fengnum tillögum hlutaðeigandi stjórna og leggur þau fyrir hreppsnefnd í samræmi við ákvæði sveitarstjórnarlaga. Þá sér hreppsráð um, að ársreikningar sveitarsjóds séu samdir og þeir ásamt ársreikningum hreppsstofnana lagðir fyrir hreppsnefnd til afgreiðslu, svo sem sveitarstjórnarlög mæla fyrir um.

Hreppsráð gerir tillögur til hreppsnefndar um afgreiðslu einstakra mála, sem það fær til meðferðar. Hreppsráði er þó heimil fullnaðarafgreiðsla mála sem ekki varða verulega fjárhag sveitarsjóds eða stofnana hans, enda sé ekki ágreiningur milli hreppsráðsmanna eða við sveitarstjóra um slíka afgreiðslu. Hreppsráð ákveður skiptingu og ráðstöfun fjár sem ætlað er til einstakra málaflokka skv. fjárhagsáætlun, s.s. til gatnagerðar, nýbygginga og óvissra útgjalda.

Þá getur hreppsnefnd falið hreppsráði fullnaðarafgreiðslu mála nema lög mæli á annan veg.

## 53. gr.

*Starfsmenn á fundi hreppsráðs.*

Skylt er starfsmönnum sveitarfélagsins að sitja fundi hreppsráðs ef þess er óskað.

## 54. gr.

*Boðun fyrsta fundar nefnda og ráða.*

Oddviti hreppsnefndar boðar til fyrsta fundar hreppsráðs og nefnda eða ákveður hver skuli gera það. Á þeim fundi skal kjósa formann, varaformann og ritara nefndar, nema lög kveði á um annað.

Formaður nefndar boðar eða lætur boða fundi í nefnd með a.m.k. eins sólarhrings fyrirvara.

## 55. gr.

*Fundarseta.*

Nefndarmanni er skylt að sækja fundi nema lögmæt forföll hamli. Þegar aðalmaður í nefnd forfallast um stundarsakir skal varamaður hans taka sæti í nefndinni. Þegar aðalmaður í nefnd flyst burt úr sveitarfélaginu, fellur frá eða forfallast á annan hátt varanlega, tekur varamaður hans sæti nema hreppsnefnd ákveði að kjósa aðalmann að nýju.

Hafi tveir eða fleiri flokkar eða framboðsaðilar haft samstarf um nefndarkosningar skal sá sem tilnefndi viðkomandi nefndarmann einnig tilnefna varamann hans, sé eigi öðruvísi ákveðið í yfirlýsingu skv. 2. mgr. 35. gr. sveitarstjórnarlaga.

## 56. gr.

*Lokaðir fundir.*

Nefndarfundur skal haldinn fyrir luktum dyrum. Nefnd getur kvatt á sinn fund einstaka starfsmenn sveitarfélagsins. Ennfremur getur nefnd boðið aðila að koma á sinn fund til viðræðna um tiltekin mál.

## 57. gr.

*Fundarstjórn.*

Formaður nefndar stýrir fundum. Ákvæði III. og IV. kafla samþykktar þessarar gilda um meðferð mála í nefndum, ráðum og stjórnnum sveitarfélagsins, eftir því sem við á.

## 58. gr.

*Hlutverk og valdsvið nefnda.*

Um hlutverk og valdsvið nefnda, ráða og stjórná á vegum sveitarfélagsins fer eftir því sem ákveðið er í lögum, reglugerðum eða samþykktum hreppsnefndar.

Hreppsnefnd getur falið nefnd fullnaðarafgreiðslu einstakra mála eða málaflokka nema í þeim tilfellum sem lög kveða á um annað.

## 59. gr.

*Fundargerðabækur.*

Nefndir, ráð og stjórnir sveitarfélagsins skulu halda gerðabækur. Ritari nefndar skal færa fundargerð í gerðabók. Í fundargerð skal skrá hvar og hvenær fundur er haldinn og hverjir sitji hann. Þá skal skrá í fundargerð einstök mál sem tekin eru fyrir á fundi, dagsetningu þeirra, nöfn aðila, meginefni og hvaða afgreiðslu það hlýtur. Í lok fundar skal fundargerð lesin upp og allir viðstaddir nefndarmenn undirrita hana.

## 60. gr.

*Afgreiðsla fundargerða nefnda, ráða og stjórná.*

Fundargerðir nefnda, ráða og stjórná sveitarfélagsins skulu að jafnaði teknar á dagskrá hreppsnefndar og skal það gert svo fljótt sem unnt er að afloknum nefndarfundum.

Ályktun nefndar, ráðs eða stjórnar sem hefur í för með sér aukin útgjöld skal ætíð lögð sérstaklega fyrir hreppsráð og síðan hreppsnefnd til endanlegrar afgreiðslu.

## 61. gr.

*Nefndir, ráð, stjórnir, tilnefningar og kosningar.*

Hreppsnefnd kýs í eftirtaldar nefndir, ráð og stjórnir:

- (i) **Hreppsráð.** Hreppsnefnd kýs þrjú hreppsnefndarfulltrúa og þrjú til vara í hreppsráð skv. 55. gr. sveitarstjórnarlaga og 48. gr. samþykktar þessarar. Eingöngu hreppsnefndarfulltrúar eru kjörgengir í hreppsráð. Hreppsráð er kosið árlega. Kjósa skal í hreppsráð á fyrsta eða öðrum fundi nýkjörinnar hreppsnefndar og síðan árlega í júnímánuði. Auk þeirra fulltrúa sem ná kjöri eiga þeir listar sem ekki fá kjörinn fulltrúa í hreppsráð rétt á að tilnefna fulltrúa til setu á fundi hreppsráðs, hver listi og skal hann hafa málfrelsi og tillögurétt. Auk framangreindra verkefna hreppsráðs fer ráðið með verkefni kjaranefndar og starfskjaranefndar.
- (ii) **Nefndir.** Hér er um að ræða fagnefndir, sem sinna faglegu starfi þeirra málaflokka sem þeim hafa verið falin af hreppsnefnd með erindisbréfum.
1. *Atvinnu- og ferðamálanefnd.* Hreppsnefnd kýs þrjú fulltrúa og jafnmarga til vara í atvinnu- og ferðamálanefnd. Nefndin er kosið á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar.
  2. *Byggingarnefnd.* Hreppsnefnd kýs þrjú fulltrúa og jafnmarga til vara í byggingarnefnd, sbr. skipulags- og byggingarlög. Byggingarnefnd er kosið á fyrsta fundi nýkjörinnar hreppsnefndar og er kjörtímabil hennar þá hið sama og hreppsnefndar. Auk verkefna sem byggingarnefnd hefur með höndum skv. lögum annast hún ferlimál fatlaðra, en einnig getur hreppsnefnd falið henni ýmis verkefni með erindisbréfi. Nefndin skal tilnefna einn aðalfulltrúa og annan til vara í heilbrigðisnefnd Garðabæjar og Bessastaðahrepps. Tilnefningar þessar öðlast gildi við samþykkt hreppsnefndar.
  3. *Félagsmálanefnd.* Hreppsnefnd kýs þrjú fulltrúa og jafnmarga til vara í félagsmálanefnd, sbr. lög um félagspjónustu sveitarfélaga. Félagsmálanefnd er kosið á fyrsta eða öðrum fundi nýkjörinnar hreppsnefndar og er kjörtímabil hennar hið sama og hreppsnefndar.

Félagsmálanefnd fer með verkefni jafnréttisnefndar, áfengisvarnanefndar, öldrunarnefndar, hefur umsjón með daggæslu í heimahúsum, hefur umsjón með framkvæmd laga um vernd barna og ungmenna, málefni fatlaðra og málefni aldraðra. Auk verkefna sem félagsmálanefnd hefur með höndum skv. lögum getur hreppsnefnd falið henni ýmis verkefni með erindisbréfi. Nefndin tilnefnir einn fulltrúa og annan til vara í sameiginlega barnaverndarnefnd Garðabæjar og Bessastaðahrepps. Nefndin skal tilnefna einn áheyrnarfulltrúa í stjórn heilsugæslustöðvarinnar Sólvangs. Tilnefningar nefndarinnar öðlast gildi við samþykkt hreppsnefndar. Formaður nefndarinnar er jafnframt fulltrúi sveitarfélagsins í þjónustuhópi aldraðra í heilsugæsluumdæminu.

4. *Íþrótt- og tómsundanefnd.* Hreppsnefnd kýs þrjá fulltrúa og jafnmarga til vara í íþrótt- og tómsundanefnd skv. heimild í sveitarstjórnarlögum og lögum um æskulýðsmál. Íþrótt- og tómsundanefnd er kosin á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar. Auk verkefna sem íþrótt- og tómsundanefnd hefur með höndum skv. lögum getur hreppsnefnd falið henni ýmis verkefni með erindisbréfi.
  5. *Kjörstjórn til sveitarstjórnarkosninga.* Hreppsnefnd kýs þrjá fulltrúa og jafnmarga til vara í kjörstjórn til sveitarstjórnarkosninga. Á fyrsta fundi nýkjörinnar hreppsnefndar er kjörstjórn til sveitarstjórnarkosninga kosin og er kjörtímabil hennar þá hið sama og hreppsnefndar. Kjörstjórn fer með þau verkefni sem henni eru falin skv. ákvæðum laga sem gilda um kosningar til sveitarstjórna.
  6. *Kjörstjórn vegna alþingiskosninga.* Hreppsnefnd kýs þrjá fulltrúa og jafnmarga til vara í kjörstjórn vegna alþingiskosninga sbr. ákvæði laga. Kjörstjórn fer með þau verkefni sem henni eru falin skv. ákvæðum laga um kosningar til Alþingis.
  7. *Skipulagsnefnd.* Hreppsnefnd kýs þrjá fulltrúa og jafnmarga til vara í skipulagsnefnd sbr. skipulags- og byggingarlög. Nefndin er kosin á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar. Auk verkefna sem skipulagsnefnd hefur með höndum skv. lögum getur hreppsnefnd falið henni ýmis verkefni með erindisbréfi.
  8. *Skólanefnd.* Hreppsnefnd kýs þrjá fulltrúa og jafnmarga til vara í skólanefnd. Skólanefnd er kosin á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar. Skólanefnd fer með málefni grunnskóla skv. grunnskólalögum, leikskóla skv. lögum um leikskóla og bókasöfn skv. ákvæðum laga um almenningsbókasöfn. Auk verkefna sem skólanefnd hefur með höndum skv. lögum getur hreppsnefnd falið henni ýmis verkefni með erindisbréfi.
  9. *Tónlistarskólanefnd.* Hreppsnefnd kýs þrjá fulltrúa og jafnmarga til vara í tónlistarskólanefnd. Tónlistarskólanefnd er kosin á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar. Tónlistarskólanefnd fer með málefni tónlistarskólans skv. ákvæðum skipulagsskrár skólans og laga sem um rekstur tónlistarskóla gilda hverju sinni. Auk verkefna sem tónlistarskólanefnd hefur með höndum skv. lögum getur hreppsnefnd falið henni ýmis verkefni með erindisbréfi.
  10. *Umhverfisnefnd.* Hreppsnefnd kýs þrjá fulltrúa og jafnmarga til vara í umhverfisnefnd, sbr. mengunarvarnareglugerð. Umhverfisnefnd sinnir lögbundnum verkefnum gróðurverndarnefndar og náttúruverndarnefndar. Umhverfisnefnd er kosin á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar. Auk verkefna sem umhverfisnefnd hefur með höndum skv. lögum getur hreppsnefnd falið henni ýmis verkefni með erindisbréfi.
- (iii) **Stjórnir og samstarfsráð.** Hér er um að ræða stjórnir stofnana með sjálfstæðan fjárhag og tilnefningar í samstarfsráð, sem hafa endanlegt ákvörðunarvald í málefnum sínum, þ.e. þurfa ekki staðfestingu hreppsnefndar til að koma málum í framkvæmd innan

ákveðins fjárhagslegs ramma. Kjörtímabil þeirra er samkvæmt samþykktum um stjórn viðkomandi stofnunar.

1. *Almannavarnanefnd*. Hreppsnefnd kýs einn fulltrúa og annan til vara í almannavarnanefnd skv. lögum um almannavarnir. Fulltrúi sveitarfélagsins er kosinn á fyrsta eða öðrum fundi nýkjörinnar hreppsnefndar og er kjörtímabil hans þá hið sama og hreppsnefndar.
  2. *Áheyrnarfulltrúi í stjórn Sólvangs*. Hreppsnefnd kýs einn fulltrúa og annan til vara sem áheyrnarfulltrúa í stjórn Sólvangs, skv. ákvæðum laga um heilbrigðisþjónustu. Fulltrúi sveitarfélagsins er kosinn m.t.t. tilnefningar félagsmálanefndar á öðrum eða þriðja fundi nýkjörinnar hreppsnefndar og er kjörtímabil hans þá hið sama og hreppsnefndar.
  3. *Barnaverndarnefnd*. Hreppsnefnd kýs einn fulltrúa og annan til vara í fimm manna barnaverndarnefnd Garðabæjar og Bessastaðahrepps skv. ákvæðum laga sem gilda um vernd barna og unglinga hverju sinni. Fulltrúi sveitarfélagsins er kosinn m.t.t. tilnefningar félagsmálanefndar á öðrum eða þriðja fundi nýkjörinnar hreppsnefndar og er kjörtímabil hans þá hið sama og hreppsnefndar.
  4. *Bláfjallanefnd*. Hreppsnefnd kýs einn fulltrúa og annan til vara í Bláfjallanefnd skv. ákvæðum samstarfssamnings. Fulltrúi sveitarfélagsins er kosinn á fyrsta eða öðrum fundi nýkjörinnar hreppsnefndar og er kjörtímabil hans þá hið sama og hreppsnefndar.
  5. *Fjallskila- og afréttanefnd*. Hreppsnefnd kýs einn fulltrúa og annan til vara í sameiginlega fjallskila- og afréttarnefnd Bessastaðahrepps, Garðabæjar og Hafnarfjarðar. Fulltrúi sveitarfélagsins er kosinn á fyrsta eða öðrum fundi nýkjörinnar hreppsnefndar og er kjörtímabil hans þá hið sama og hreppsnefndar.
  6. *Heilbrigðisnefnd Garðabæjar og Bessastaðahrepps*. Hreppsnefnd kýs einn fulltrúa og annan til vara í fimm manna heilbrigðisnefnd Garðabæjar og Bessastaðahrepps skv. ákvæðum laga um hollustuhætti og heilbrigðiseftirlit. Fulltrúi sveitarfélagsins er kosinn m.t.t. tilnefningar byggingarnefndar á öðrum eða þriðja fundi nýkjörinnar hreppsnefndar og er kjörtímabil hans þá hið sama og hreppsnefndar.
  7. *Húsnæðisnefnd*. Samkvæmt lögum sem um Húsnæðisstofnun ríkisins gilda hverju sinni skipar hreppsnefnd fimm menn í húsnæðisnefnd og jafnmarga til vara, þar af skulu tveir vera tilnefndir af stærstu launþegasamtökum í sveitarfélaginu. Húsnæðisnefnd er kosin á fyrsta eða öðrum fundi nýkjörinnar hreppsnefndar og er kjörtímabil hennar þá hið sama og hreppsnefndar. Auk verkefna sem húsnæðisnefnd hefur með höndum skv. lögum getur hreppsnefnd falið henni ýmis verkefni með erindisbréfi.
  8. *Stjórn Almenningsvagna bs.* Hreppsnefnd Bessastaðahrepps kýs einn fulltrúa og annan til vara í stjórn Almenningsvagna bs. til eins árs í senn, skv. samningum þar um.
  9. *Stjórn SSH*. Hreppsnefnd kýs einn fulltrúa og annan til vara til setu í stjórn SSH, sbr. samþykktir sem um SSH gilda hverju sinni. Fulltrúi sveitarfélagsins skal kosinn árlega.
- (iv) **Tilnefningar og kosningar.** Kosnir fulltrúar á ársþing og ársfundi stofnana sem sveitarfélagið á aðild að. Kosning skal fara fram á fyrsta og öðrum fundi nýkjörinnar hreppsnefndar og síðan í júní ár hvert vegna þeirra tilnefninga sem gilda í eitt ár.
1. *Fulltrúaráð Almenningsvagna bs.* Hreppsnefnd kýs tvo fulltrúa og jafnmarga til vara í fulltrúaráð Almenningsvagna bs.
  2. *Fulltrúaráð Sorpu bs.* Hreppsnefnd kýs tvo fulltrúa og jafnmarga til vara í fulltrúaráð Sorpu bs.
- (v) **Lögbundin kosning embættismanna.** Samkvæmt lögum ber hreppsnefnd að kjósa eftirtalda embættismenn.
1. *Búfjárefnirlitsmaður.* Hreppsnefnd kýs einn búfjárefnirlitsmann og annan til vara skv. lögum um búfjárhald. Búfjárefnirlitsmaður er kosinn á fyrsta eða öðrum fundi nýkjörinnar hreppsnefndar og er kjörtímabil hans þá hið sama og hreppsnefndar.

2. *Skoðunarmenn sveitarsjóðsreikninga*. Hreppsnefnd kýs tvo skoðunarmenn og jafnmarga til vara skv. sveitarstjórnarlögum. Skoðunarmenn sveitarsjóðsreikninga eru fyrst kosnir á fyrsta eða öðrum fundi nýkjörinnar hreppsnefndar til eins árs í senn.
  3. *Úttektarmaður*. Hreppsnefnd tilnefnir einn úttektarmann og annan til vara skv. ákvæðum ábúðarlaga.
- (vi) **Verkefnabundnar nefndir**. Hreppsnefnd getur kosið nefndir (lausanefndir) til að vinna að einstökum afmörkuðum verkefnum. Umboð slíkra nefnda fellur niður þegar liðin eru fjögur ár frá því nefndin var kosin og fyrr ef verkefni nefndar er lokið. Hreppsnefnd getur þó afturkallað umboð slíkra nefnda hvenær sem er. Hreppsnefnd útbýr erindisbréf fyrir nefndina þar sem hlutverk og staða þeirra er skilgreint.

## VI. KAFLI

### Um framkvæmdastjórn og starfslið sveitarfélagsins.

#### 62. gr.

##### *Ráðning sveitarstjóra.*

Hreppsnefnd ræður sveitarstjóra. Gera skal skriflegan ráðningarsamning við sveitarstjóra þar sem m.a. skal kveðið á um ráðningartíma hans, kaup og kjör. Ráðningarsamningur skal staðfestur af hreppsnefnd.

#### 63. gr.

##### *Hlutverk sveitarstjóra.*

Sveitarstjóri er framkvæmdastjóri sveitarfélagsins. Hann undirbýr fundi hreppsráðs og hreppsnefndar, semur dagskrá og boðar til fundar, sbr. 14. gr. samþykktar þessarar. Hann á sæti á fundum hreppsnefndar/hreppsráðs og hefur þar málfrelsi og tillögurétt en eigi atkvæðisrétt nema hann sé kjörinn fulltrúi í hreppsnefnd/hreppsráði. Hann hefur og rétt til setu á fundum nefnda sveitarfélagsins með sömu réttindum.

Sveitarstjóri hefur á hendi framkvæmd ákvarðana hreppsnefndar og málefna sveitarfélagsins að svo miklu leyti sem hreppsnefnd hefur ekki ákveðið annað.

Sveitarstjóri er prókúruhafi sveitarsjóðs. Hann undirritar skjöl varðandi kaup og sölu fasteigna sveitarfélagsins, lántökur og aðrar skuldbindingar.

Sveitarstjóri er æðsti yfirmaður starfsliðs sveitarfélagsins.

Hreppsnefnd ákveður hver skuli gegna störfum sveitarstjóra í forföllum hans.

#### 64. gr.

##### *Ráðning starfsmanna.*

Hreppsráð ræður forstöðumenn og veitir þeim lausn frá störfum, nema vald til slíks sé með lögum fengið öðrum aðilum eða á annan veg mælt fyrir í reglugerðum um sérmál tiltekinna stofnana.

Forstöðumenn ráða starfsmenn sína, bæði fasta og lausráðna, og veita þeim lausn frá störfum í samráði við sveitarstjóra, nema vald til slíks sé með lögum fengið öðrum aðilum eða á annan veg mælt fyrir í reglugerðum um sérmál tiltekinna stofnana.

#### 65. gr.

##### *Fastráðnir starfsmenn.*

Fastar stöður skuli að jafnaði auglýstar til umsóknar. Hreppsráð getur ákveðið hvaða almenn skilyrði skulu gilda um ráðningar í stöður hjá sveitarfélaginu.

Fastráðnir starfsmenn hreppsins skulu ráðnir til óákveðins tíma með gagnkvæmum 3ja mánaða uppsagnarfresti miðað við mánaðamót. Þeir hafa réttindi og skyldur opinberra starfsmanna sbr. lög þar um eftir því sem við á.

Gera skal skriflegan ráðningarsamning við fastráðna starfsmenn þar sem fram koma lágmarksákvæði um ráðningarkjör og starfssvið þeirra. Um kaup og kjör fer eftir ráðningarsamningi og gildandi kjarasamningum hverju sinni.

Hreppsnefnd ákveður með sérstökum samþykktum, hvaða störf skulu vera talin föst hjá sveitarfélaginu og fyrirtækjum þess, auk þeirra starfa sem samkvæmt lögum og reglugerðum eru talin föst störf.

Um kaup og kjör lausráðinna starfsmanna fer eftir kjarasamningum viðkomandi stéttarféлага.

Samþykkt þessi sem hreppsnefnd Bessastaðahrepps hefur sett samkvæmt ákvæðum 3. mgr. 7. gr. og 49. gr. sveitarstjórnarlaga nr. 8/1986, staðfestist hér með til að öðlast gildi að loknum sveitarstjórnarkosningum í maí 1998. Þó skal 1. gr. samþykktarinnar taka gildi nú þegar þannig að í sveitarstjórnarkosningum í maí 1998 verði kjörnir 7 aðalmenn í hreppsnefnd Bessastaðahrepps. Við gildistöku samþykktar þessarar fellur úr gildi samþykkt um stjórn og fundarsköp Bessastaðahrepps nr. 244/1990 og samþykkt nr. 354/1994 um breytingu á þeirri samþykkt.

*Félagsmálaráðuneytinu, 24. mars 1998.*

F. h. r.

**Húnbogi Þorsteinsson.**

*Sesselja Árnadóttir.*

## AUGLÝSING

### um breytingu á gjaldskrá Hitaveitu Borgarness.

Samkvæmt orkulögum nr. 58, 29. apríl 1967, hefur ráðuneytið staðfest eftirfarandi breytingu á gjaldskrá Hitaveitu Borgarness er taki gildi 1. mars 1998.

Gjaldskrá Hitaveitu Borgarness nr. 475 21. júlí 1997, 3. gr. verður þannig:

3. gr.

Gjald fyrir afnot af heita vatninu er:

- a) Þeir sem greiða fastagjald samkvæmt 2. gr. greiða 66,82 kr. fyrir hvern rúmmetra vatns.
  - b) Þeir sem ekki greiða fastagjald samkvæmt 2. gr. greiða 89,03 kr. fyrir hvern rúmmetra vatns.
  - c) Gjald vegna vatnsnotkunar íþróttamiðstöðvarinnar í Borgarnesi skal vera 50% af gjaldskrá, a-lið.
- Gjald leiðréttist miðað við reiknað hitastig við húsvegg sbr. 18. gr. reglugerðar hitaveitunnar.

*Iðnaðarráðuneytinu, 30. mars 1998.*

F. h. r.

**Kristmundur Halldórsson.**

*Steinunn Bjarmann.*